

Ansprache Wave-Trophy e-mobility Rally 16. Juni 2019 in Glarus

Liäbi Teilnähmer vu dr WAVE Switzerland
Gschätzti Tourverantwortlichi, Sponsorä und Gäscht
Liäbi Bsuächerinä und Bsuächer

Im Name vum ganzä Regierigsrat vum Kantu Glaris begrüässä
ich üch all und ganz bsunders üseri uuswärtigä Gäscht da ds
Glaris ganz hätzli. Äs freut mi sehr, dass Ihr Glaris as
ettappäort usgläsä händ.

Ich hoffä, ihr heiged all ä guäti Fahrt über ä Gschichtsträchtigä
Klausäpass ka und siged uufalfrii und fit i dr chliinschtä
Hauptstadt vu dr Schwiiz aachu.

Bau und Umwelt
Kirchstrasse 2
8750 Glarus



kanton **glarus**

Bereits zum 10. Mal findet diä, **ücheri** grösscht jährlich stattfindend E-mobil-Rallye statt. Aber gfühlt isch ds Thema vo dr E-Mobilität nuch niä ä so präsent gsi we gad aktuell.

D'Zämäsetzig vu ücherer Karawannä, wo vu Privatteams über namhafti Unternämä, vu Universtität zu Journalischtä gaht, zeiged au ganz exemplarisch, dass das Thema üs all betrifft, beschäftigt aber vor allem au interessiert.

So vielfältig we d'Teilnähmer sind aber au ücheri Fahrzüüg. Au wenn ds Uusgsi und de lisatzmüöglichkeitä zum Teil sehr unterschiedlich sind, dä händler doch all ä gmeinsams Ziel, nämli uf ds zeigä, dass d'E-Mobilität ä suuberi und alltagstaugliche Art vu dr Mobilität isch – oder cha wärdä.

Bau und Umwelt
Kirchstrasse 2
8750 Glarus



kanton **glarus**

Mir wüessed all, dass üs d'Klimaveränderig fordered. Gad imä Bergkantu we Glaris sind d'Uuswürgig leider sehr guät ds erkännä und ds gspüürä. Uf der eintä siitä simmer derum sehr starch gforderet, mit dr sich veränderndä Natur und dä da drus entstehendi Ereignis we Gletscherschmelzi, Trochäheit, Waldbrand au im Schutzwald oder extremä Wetterereignis we Niederschlag und Sturm chänä um ds gu.

Uf dr anderä Siitä gilts, de Veränderig im Minimum chänä ds verlangsamä, im beschtä Fall sogar ds stoppä. Wämä der CO2 Uusstoos will reduzierä, dä gilts, dr Hebel bi dr Gebäudetechnik und au bim Verchehr aads setzä.

Dass eim bim Verchehr natürli sofort d'E-Mobilität i ds Aug sticht, wo zu Lösung vum Problem öppis chänt biitragä, isch logisch.

Bau und Umwelt
Kirchstrasse 2
8750 Glarus



kanton **glarus**

Mir wüessed aber underdessä au, dass es meischtens mi as numä ä erschtä Bligg brucht, bis mä öppis cha definitiv und guät beurteilä. Wiä ökologisch hüüt äs Elektrofahrzüüg isch, hanget vu sehr vielnä Komponentä ab. I China, wos i dä Städt sehr viel E-mobil hät, hät mä zwar ds Problem vum Fiistaub i dä Städt ä chlä chänä verbesserä. Bim CO2-Uusschtos isch d'Bilanz aber nüd so eidüütig, wird doch det viel Kohlestrom produziert und ligsetzt.

I dr Schwiiz hämmer ds Glügg, dass mir uf viel suuberä Strom chänd zuägriffä und d'Ökobilanz derum besser uusgsiit. Wämä dä aber de Bilanz über dr ganz Läbeszyklus vumä E-Auto ziäht, aso vu dr Produktiu bis zur Entsorgig, dä chamä so zimli für jedes Resultat womä gärä wetti präsentiert ha ä Expertämeinig gfindä.

Bau und Umwelt
Kirchstrasse 2
8750 Glarus



kanton **glarus**

Uf was will ich usä – mir stelled hüt fescht, dass IHR ÜCH, mir üs imä uuglaubli innovativä, kreativä und technischä uuglaubli kompetitivä Umfeld befinded. All de Müglichkeitä wo i dem Umfeld entstünd zum ernüerbari Energiä ds gwünnä oder ebä zum cuuli Elektro-Fahrzüüg ds machä, wo au Spass mached zum mitnä ds fahrä, sind ganz enorm wichtig und wärded dr Schlüssel si, zum nüd ds letscht im Zämähand mit dr Klimaveränderig richtigi, guäti Schritt i de richtig Richtig ds machä.

ABER – es gilt au da, mit Augämass, oder ebä ämä zweitä Bligg das Grossä-Ganzi nüd ds Vergässä. Elektroauto sind toll, aber es brucht derzuä Strom. Suuberä Strom. Und gnuäg Strom. D'Reduktiu vum CO2 Uusschtoss, d'Reduktiuu, ja gar dr Verzicht vu fossilä Brennstoff moss chänä uufgangä wärdä, dur anderi Energiä. Das brucht Ziiit und mir müänd überleit und Schritt für Schritt vorwärts gu. De diggämal ä chlä gad gar visionäre Idee vu gwüssnä Lüüt hälfed sicher, zum Forschig, Innovatiuu und Kreativität ds förderä.

Bau und Umwelt
Kirchstrasse 2
8750 Glarus



kanton **glarus**

Aber äm Ändi vum Tag bruchts dä halt au immer noch pragmatische Lösung, wo umsetzbar sind und es erlaubed, dass mir de hüütigä Bedürfnis vu dr Bevölkerig chänd befriedigä.

Ich ha ligangs vum gschichtsträchtigä Klausäpass gredt – näbscht äm damals natürli sehr ökologischä Marchälauf, wo mir Glarner ja bekanntli gägä dr Urner dr chürzer zogä händ, chunt mir aber au ds Klausärennä i Sinn. Zwüsched 1922 und 1934 isch genau 10 Mal dr Gross Bergpriis vu dr Schwiz zwüsched Linthal und dr Klausäpasshöchi uusträit wordä.

De Teilnehmer vu damals sind as muätigi, ja waghalsigi Fahrer, as Tüftler bewunderet wordä. D'Hersteller vu denä Fahrzüüg sind innovativ, kreativ gsi und das technisch Umfeld uuglaublich kompetitiv – genau we ihr hüt. Sie sind Heldä gsi und ihri Fahrzüg äs versprächä für d'Zuäkunft. Berg- oder Rundstreggä-Rännä händ derzuä dient, zum de Fahrzüüg wiiter dsentwiggli für nä breiteres Publikum. Genau we bi üch hüt.

Bau und Umwelt
Kirchstrasse 2
8750 Glarus



kanton **glarus**

Aber de toll Errungäschafft «Auto mit Verbrennigsmotor» hät i dr hüütigä Ziit ä paar Chratzer im Lack – zums Vorsichtig uusdruggä. Mir gsänd, alles hät sini Ziit, was hüt guät isch, wird vielleicht später ämal sehr kritisch betrachtet. Wer weiss, wemä i 50 oder 100 Jahr über de hüütigä Elektrofahrzüüg redt...

Trotzdem – waged mir d'Zukunft, verfolged mir der Weg wiiter, innovativ, kreativ und mit allnä technischä Müglichkeitä womer händ. Aber verfolged mir der Weg au mit gsundem Menschäverstand, mit Augenmaas und dr Sicht für ds Ganzä. Verfolged mir der Weg aber au äso mitenand, dass mir vu dä verschiedenä zur Verfüägig stehendä technischä Müglichkeitä chänd profitierä, uhni Vorurteil i welli Richtig es au immer gaht und vor allem uhni ideologischä Grabäkämpf.

Schaffed Sie wiiter mit, entwerfed Sie de mobil Zuäkunft. Us em Bliggwinggel vu derä Zuäkunft wärded mir dä chänä de nüüä Innovatiunä beurteilä und dä chämer zu dä richtigä Ergebnis und ermüglched dr entsprechend Fortschritt.

Bau und Umwelt
Kirchstrasse 2
8750 Glarus



kanton **glarus**

Ich danggä Ihnä für Ihres Engagement und wünschä ä dä
Teilnähmer ä erfolgrichi, uufallfrii Fortsetzig vu dr WAVE-Tour
und ä allnä ä gmöigä Sunntig da bi üs ds Glaris.

Beschtä Dangg für Ihri Ufmerksamkeit.

Bau und Umwelt
Kirchstrasse 2
8750 Glarus



kanton **glarus**